

No. 894. 1416. 18. Juli.

B. Rudolph genehmigt, dass Hanns von Schleinitz zu Schieritz Zinsen zu Praterschütz an das Capitel verkaufe.

Wir Rudolff von gotes gnaden bisschoff zu Missen bekennen — das vor vns ist komen der gestrenge ritter Hannes von Slinicz zu Schiricz gesessen vnser liber getreuer vnd hat vns vorezalt eczliche redeliche sachen, durch der her mit willen vnd wissen seiner vettern recht vnd redelichen vorkouft habe den ersamen herren tumprabeste techande vnd dem ganczin capitel vnser kirchen zu Missen acht schog vierzig groschin vnd czwene hellere yerlicher gulde vnd czinse gelegen yn dem dorffe vnd flure Bratriswicz^{a)} in der pflge zu Missen, an gelde hunren vnd eygern, also das der kouffbriff eigentlichen vswyset, sy wir von dem selbien herren Hanse, hern Hugolde vnd andern seinen vettern von Slinicz mit flissiger begerunge gebeten, das wir zu dem selbien kouffe vnser gunst vnd guten willen geruchten gnediglichen zugeben. Habe wir an gesehn yre bete vnd ouch anneme dinste, dy der selbige herre Hannes von Slinicz vns vnd vnser kirchen zu Missen mit seinen vettern ofte vnd digke nuczlichen gethan hat, vnd yn zukumftigen geczieten ouch wol thun mag vnd sal, vnde haben dy vorgnanten czinse, also dy von vns vnd vnser kirchen zu Missen gein zulehne, von ym uffgelossen genomen vnd dy furbas mit allen yren zugehörungen nuzen fruchten friheiten vnd wurden den vorgnanten ersamen herren vnserm capitel zu Missen recht vnd redelichen gelegen, vnd lihen ouch mit craft dissis brifes alle yar ierlichen uffzuheben ynzunemen uff yre tage cziet vnd furbas zu reichen vnd zu entwerten yn das selhus zu Missen zu einer hulffe vnd uffhaldunge armer lute, nach deme also das dy selbien herren vnser capitel zu Missen haben geschicket vnd geordint. Doch in welchem yare der selbige herre Hannes von Slinicz seine erben oder vettern, dy das selbige gut vnd czinse von ym, von vns vnd vnser kirchen zu Missen gehabt haben yn lehen, weider koufen wollen, das sullen dy vorgnanten herren vnser capitel zu Missen weider zukouffe geben vnd das halten yn allermasse, also das der kouffbriff doruber gegeben wol vswyset. Czu orkunde vnd bekentnusse — habe wir egnanter Rudolff bisschoff zu Missen mit wissen vnd willen vnser vorgnanten capitel an dissen briff [vnser ingesigil] lossen wissentlichen hengen. Gegeben nach Cristi geburd viercezhundert yar, dornach yn dem sechczendem yare am sunabunde neest nach Margarethe der heiligen iungfrauwen vnd mertererynnen.

Nach dem Orig. im Stiftsarchiv zu Meissen mit dem Siegel des Bischofs an einem Pergamentstreifen.

a) Praterschütz, Par. Leuben bei Meissen.